

l'admiral de Chastillon , d'Andelot , son frère , le comte de La Rochefoucault et plusieurs autres seigneurs d'une mesme conjuration, lesquelz pour estre montez à l'avantaige se saulverent à course de cheval en la ville de Xainctes dudict pays de Guyenne, distante du lieu où la dicté baptaille fust donnée, de huit lieues.

Auroit Mondiet seigneur le Gouverneur faict entendre à Messieurs les Conseillers eschevins de la ville de Lyon la nouvelle de la dicté victoire à l'instant mesmes qu'il en auroit receu advisement, que fust le lundy vingt ungiesme du mois de mars dernier passé. Le quel jour furent sonnées les grosses cloches et le *Te Deum* dict et chanté en l'esglise saint Jehan, au quel *Te Deum* assistarent tant Mondiet seigneur le Gouverneur que les dicts sieurs Conseillers eschevins, les quatre officiers de la ville et grand nombre de bourgeois de la dicté ville. Le soir mesmes furent tirez et délaschez quelques pièces d'artillerie de la citadelle en signe d'allegresse. Quelques jours après, ayans esté receues plus amples et certaines nouvelles, fust délibéré par Mondiet seigneur le Gouverneur, avec les dicts sieurs Conseillers eschevins de rendre graces à Dieu de la dicté victoire et faire feuz de joye sellon la manière accoustumée , de façon que la procession générale et solempnelle fust publiée et faicte ce jourd'huy quatriesme de ce mois d'apvril, en la quelle fust porté le *CORPUS DOMINI* en toute devoction requise. La quelle procession, partant de l'esglise saint Jehan, passa en la grand rue saint Jehan, de la Juifverie, entre les deux esglises saint Pol , en la rue de Flandres, passa le pont du cousté du Rosne, et allant par la grand rue de la Grenette en la place des Cordeliers, au long de la grand rue jusques à l'hospital, retourna par la rue Merciere en la dicté esglise saint Jehan en la quelle fust célébrée la grand messe avec la predication.

En la quelle procession fust tenu bon et honorable ordre , estans les rues par où elle passoit honnorablement tapissées et parées, le quel ordre fust observé en la dicté procession en la manière qui s'ensuyt.

Premièrement, marchoit le Prévost des Mareschaulx et son